

## 2 PITA

Pitaak pep epwer ingre mor saö naröaan retëng äa. Omën naröak ngönën kaaröt ök maim wëen Pitaak wotpil wasëpënëak kent kön wiakök omën Yesuun itaampööre kat wia pöröa pitëm ngönën ök mëaut kön ngölöp wes mena.

### **Pöt epël wia.**

Ngön ngës räaut *1:1-2*

Anutuu yaö niwesauta ngönte *1:3-21*

Ngönën kaar yaauröa ngönte *2:1-22*

Kristoë kaalak waisëpnaata ngönte *3:1-18*

<sup>1</sup> O Yesu Kristoon kön wi kosang wesak tenim ök sak wëaurö, Saimon Pita ne ya omën pim ngönte yaaupök arimëen pep epwer retëng ë yaningk. Tiarim Anutu, Yesu Kristo, utpetetakaan kama yanu pöp, pim wotpil yaautak kaamök elniin kön wi kosang wesaurö.

<sup>2</sup> Ar Anuture tiarim Aköp Yesuun kön kosang wiak wëen piarpim komre kolapre mayaap pöt ningkën arim naë kaö sak wiaap.

### *Anutuuk tiar pimtëen yaö niwesaurö*

<sup>3</sup> Anutu pim ëwa ompyaö yaautak yas niaup tiar piin ewat wëen omnant pout koröpöökëere lupmeri wëwëeta kaamököt pim weere kosang kësangöök war wes ninaut.

<sup>4</sup> Pël äak pim ëwa ompyaö tapöök omën kaö ompyaö kup niwiauta këet nina. Pim kup niwia pötaan koröpöökë kentre kauratëen kö yesaö epët kasëng menak Anutuu wë pöl öpenaat.

5 Pël ëëpenaak pötaanök ke urak arim kön wi kosang yewesautak wotpil wëaut yal mampun. Wotpil wëautak ngönënë songön ke nentere nent kön tektek yesaut yal mampun.

6 Kön tektek yesautak koröpöökë ngarangk yaaut yal mangkën koröpöökë ngarangk yaaö pötak weëre kosang wëaut yal mampun. Weëre kosang pötak Anutuu wëaul önëët yal mampun.

7 Anutuu wëaul önëetak ngöntre kar yaaut yal mangkën ngöntre kar yaaö pötak lup sant yaaut yal mampun.

8 Omën pipot arim naë ulöl sak wiaapna pöt tiarim Aköp Yesu Kristoon ewat yesaut mos naëpan.

9 Ën namp pi omën pöt won wëen pöt piin epël apenaat. “Pi it il tëauröa ök sak kön ëngk ma e wesak wë utpetat iir moolëa pöten kat kola,” pël apenaat.

10 Karurö ar, Anutuuk yas niak pimëen yaö wes nuulëaurö. Pötaanök kosang sak yas niia pöt kë ëëpnaataan weë panë ngentiin. Pël ëënë pötak utpet nasëngan ompyaö önëët.

11 Pël ëaan tiarim Aköp, utpetetakaan kama yanuwaup, Yesu Kristook sant niwesak kan tē niwiin poprak naëngan pim wa ngaöök yanimë pötak ilëak wakaim önëët.

12 Yaap, ar omën pipot rë nuulön ewat wëen ngön kë arim wa pötak kosang niwasën wë. Pöt ne ewat wëak om ngolöp wes nineim ömaap.

13 Ne kön wiin öp wë pël eim öma pöt pangk ëëpnaat.

14 Pöt epël. Ne kön wiin tiarim Aköp Yesu Kristoë neea pöl akun kot nent wë wel wiimaap.

15 Pötaanök ne wel wiin omën pipotön kön wiaanëek yak ngolöp wesak kosang wes yaningk.

*Pita pi Kristoë naë wë pim ëwaöön itena*

16 Tiarim Aköp Yesu Kristoë weëre kosangring kaalak waisëpnaata ngönte tenim ök niaö pipët ëlar ngönaak omën könöökaan rëak neniaan. Ten piiring wë Aköpë ëwaöön itenaut yak ök niiaut.

17-18 Ten piiring rosir ngëëngköök wëen Anutu Pepapök piin ping wesak mëak ëwaö yemangkën ten kat wiaan Anutuuk kutöm ëwaöökaan epël ya. “Epop nem ru ulöpöököp. Ne pimëen ya kë panë yes.”

19 Pël yaan ten kat wiak tektek ngön yaaö omnaröa ngön ëa pötön kön wiin yaap pan ëaut. Pötaanök ar pitëm ngön pötön këëkë kön wiaan. Pipotök koutak esuwesi ëwa yaë pöl elniaan Kristo waisëpnaat. Pim waisëpna akunet temanöm yesën pi tangewesi yaarö pöl oröak arim könre lupötë ëwa elniipnaat.

20 Omën kaö epëten wet rëak kön wieë. Tektek ngön ngönën pepeweri wia pipotë songön pipot omnaröa könötëaan pangk naëpanëët.

21 Tektek ngön pipot omnaröa könötëaan kön wiak naënöt. Anutuu ngönöt Ngëëngk Pulöök tek-eri wes mangkën aima.

## 2

*Ngönën kaar yaauröa ngönte*

1 Ngaan Israel omnaröa naë tektek ngön yaaurö wëen kaar yaauröeta wakaima pöl kaar yaaö narö arim naë orööpnaat. Pit arim naë ëlëëp wë ngönën kaar arim kön wi kosang yewesaut utpet

wasëpnaat niak Kristo pitëm kaöap këlangön kat wiak pimëen mowa pöpönta pi kaöap pöt ngep ëak wonwon apnaat. Pël yaëen Anutuuk kangut teënt mampnaat.

<sup>2</sup> Pël ëen ngönën omën selap pitëm yaaul öngre omp nga ëëpnaat. Pël yaëen omën muntarö pitën itenak ngönënë kanöön utpet wesak apnaat.

<sup>3</sup> Kaar omën pörö pit monere urömatön war ëen arim naëaan öpënëak morök elniak ngön kaaröt niapnaat. Omën ke pëlöröaan Anutuuk ngaanëer ngön kosang wiAUT wiap nasën kosang wiakaimaut peene pet irën kö sëpënëak yaë.

<sup>4</sup> Ensel narö nganëer utpet yaëen Anutuuk mait naalmëen wii téak es parëaöök moolëa. Pël ëen koutak së ngan i akuneten kor eim wë.

<sup>5</sup> Omën ngaan pan wakaimauröeta pi mait naalmëen i ngep ëëpënëak maan Anutuu ngön wa olëaurö pourö kö sa. Pël ëen Noa wotpil wëauta ngönte yaaupring omën kopët 7 ëak öp sa.

<sup>6</sup> Kaalak Sotomre Komora ka pörarta tapël kö sëpënëak maan es kot won sa. Pël ëa pötak omën ënëm utpet ëëpnaaröaan pepanöm ëa.

<sup>7</sup> Lot pi wotpil wë omën utpetaröa öngre omp nga yaautëen ya utpetaring wëen Anutuuk mait elmëak kama wa.

<sup>8</sup> Omën wotpil pöp pitëm tekarak wë kët ël epotë pitëm utpet yaautön itaampööre kat wi pël eimeë kön utpetaring wakaima. Pötaanök kö nasën ëa.

<sup>9</sup> Aköp pi ompyaö ëaurö mait elmëa pötaan pim ngön kat yawiaurö morökötëaan pangk kama öpnaap. Ën utpet yaaurö ngan i akunetak këlangön kat mowiipnaap.

<sup>10</sup> Omën narö pitëm koröpöökë kentre kaur

utpetatë ënëm yeem Aköp ngep yaalmë pörö këlangön kaö kat mowiipnaap.

Ngönën omën kaar pörö pitëmtën wak isak aimeë pitëmtë könöök omnant yeem kutömweri ëwaatak wëauröen kas naën utpet wesak yamëëaurö.

<sup>11</sup> Pël yaauröak ensel kaö weëre kosangring pit il yemowas pöröak Aköpë ëöetak kangiiir utpet wesak nemaan yaaurö.

<sup>12</sup> Omën piporö kön won, animaö omnant köntak yaë pöröa ökörö. Animaö pörö omnaröak mööpenëak pitëm ëlöröak yawilaurö. Pit omnantë songönötön kön nawiin utpet wesak aimeë animauröa yaë pöl kö sëpnaarö.

<sup>13</sup> Pël ëak pitëm utpet yaaütë kangiiir këlangön kat wiipnaarö. Pit këtëkötë ëö köpël koröpöökë kentre kauratë ënëm yeem utpet ke nentere nent yaaütön kön wiin ompyaö ëëpnaat. Pit ëöa pipot yaauröak arim kaatë wais kaömp ngawi yenem utpet niwesak pitëm pël yaaö pötaan ërëpsawi yaaurö.

<sup>14</sup> Pitëm itöt öngöröen kentre kauraring iteneimeë utpetat kep köpël yaaurö. Pël ëak omën lup wiap yaauröen wiap sësë mëak utpet yemowesaurö. Pit monere urömat keimön panë yaaurö. Elei, omën ke pilörö pit es parëaöök së kö sëpnaarö.

<sup>15</sup> Pit wotpil wëauta kanö kasëng menak irikor yeem tektek ngön yaaö omën kaar Pelam, Pioë rupë kanöök yesaurö. Pi utpetatëen sumat öpënëak kent yaëen

<sup>16</sup> pimtë pol tongki ngön wonöpök omën ngönring irikor yeem utpet ëëpanëak kan mowaria.

<sup>17</sup> Kaar omën piporö i leep yarëautë ökörö.

Kepilöt kentöök wak sē waisö yaëen kopi nepelēn yaë pōta ökörö. Omēn ke pilörö Anutuuk koö panēetak öpēnēak yaö mēēa.

<sup>18</sup> Pit pitēmtēn ping wesak ēak ngōn mosut yamēem köpēl omnarōen koröpöökē kentre kau-ratē ēnēm yeem öngre omp nga ēēpēnēak wiap sēsē yamēēaurö. Köpēl omēn pörö utpetat sēp wesak kan ngölöpöök sēpēnēak yaëen pēl yaalmēaurö.

<sup>19</sup> Pēl yeem epēl yema. “Omēn eptak wii ket ēak nanitēen ēēpnaat,” pēl yemaatak pitēmtē omnant yaautök utpet mowesak wii motēen wēaurö. Omēn nent tiarök kaö wesak inēen elmēēpena pöt pötak wii ket ēak nitēēpnaat.

<sup>20</sup> Omēn namp pi tiarim Aköp Yesu Kristo, utpetetakaan kama yaniwaup, piin kön wi kosang wesa pötak yangerakē utpet yaaut sēp wesak wē ēnēmak kaalak pötē sē rē olaan wii motēēpna pöt ngaan utpet wakaima pöt kotte, ēnēm pöt kaö panē sēpnaat.

<sup>21</sup> Omēn ke pilēp pi wotpil wēauta kanöök nasēnēpök yaë talte pangk ēēpēn. Anutuu ngōn kosang ngēēngköt rē moulaupök kan pö kasēng yemangkēn pangk naēn pan yaë.

<sup>22</sup> Omēn pēl yaë pöp piik ngōn nokoliil epēl ēa pöt kosang yes. “Kentēp pi köl ngēs olēak kaalak yen.” Ēn nent. “Polöp pi iir moulmēen kaalak kepi yeila.”

### 3

#### *Aköpē waisēpnaata ngōnte*

<sup>1</sup> Nem kar panēerö, ne ngaan pep newer retēng ē ninaut. Peene epwer kaalak ningkēn neweriar

yes. Pouweriarë wotpil wesak kön wiinëëtaan ngön epët ngolöp wes nimpëak retëng yeë.

<sup>2</sup> Tektek ngön yaaö omën ngëëngköröa ngaanëër ngön ëa pötre tiarim Aköp utpetetakaan kama yaniwaupë ngön kosang ngön yaaö omnarö tenim arën ök niia pötönta kön wiinëak ëaut.

<sup>3</sup> Ar wet rëak epël kön kosang wiin. Yanger pet irëpna akunet temanöm yesën omën pitëmtë koröpöökë kentre kauratë ënëm yaaurö oröak ökre was ngön epël niapnaat.

<sup>4</sup> “Yesu kaalak waisëpënëak ëa pöt yaap ma? Pi tarëk wë? Tiarim ëarö wel wieimauro. Ën omën epot pout yanger yaaröön oröautta tapël om wiaap.”

<sup>5</sup> Pël yeem Anutuu ngaanëër ëa pöten kön wiipnaaten kaaö yaaurö. Ngaanëër Anutuuk maan kutömre yang oröa. Yanger i kaöökaan oröak i kaö tapöökë rangk wiakaima.

<sup>6</sup> Pël ëën ënëmak Anutuuk maan i kaöök yang ngaan wiakaimaur ngep ëak utpet wesa.

<sup>7</sup> Ën kutömre yang peene e wia epot Anutuuk tapël maan es kot won sëpënëak yaö ëa. Epot om wiaan ënëmak Anutuu ngönën wonöröaan ngön ë pet irëpnaatak pitring kö sëpnaat.

<sup>8</sup> Kar panëërö, ar omën epëten ëngk ma e wasngan. Aköp pi tiar omnaröa kön yawi pöl naën. Pi kët kopët nenten kön wiin krismaki 1000 pöta ök yaaup. Ën krismaki 1000 pöten kön wiin kët kopëtet pël yaaup.

<sup>9</sup> Aköp pi pim ngön ëa pöta këët tekeri wasëpnaaten ëngk ma e ëak akun wali naön. Omën naröak kön wiin pël koröp yaë. Won, pi omnarö kö

sënganëak arimëënök kor wë. Pi omën pourö lup kaip tiinëak korkor yaë.

*Kutömre yang epot won sëpnaat*

<sup>10</sup> Aköp pi korkor yaëetak pim akun kaöet këkain yaauroa yaë pöl ëlëep tapët pöt orööpnaat. Pël yaëen kutömwer rirre por kësang ëak won yesën omën pörek wieëa pöt pout es kotak won sëpnaat. Pël ëen yangere yangera rangk omën epot pout es kot won sëpnaat.

<sup>11</sup> Pël ëëpnaat pötaanök ar wotpil wë Anutuu ngönte taintaë wak ön.

<sup>12</sup> Pël yeem Anutuu kaalak waisëpna akuneten kor wë akun pöt teënt orööpnaan kosang wesak ya ompyaö mëmpun. Akun pötak kutömwer es kotak kö yesën omën pörek wieëa pöt pout tapël es kot won sëpnaat.

<sup>13</sup> Tiar pöt, kutömre yang ngolöpötön Anutuuk kup niwiin kor wë. Pörek wotpil öpen sa.

*Aköpön kor wë ngarangk këëkë ëëpa*

<sup>14</sup> Nem kar panëerö, ar omën pötëen kor wë pötaan arim lupötë kölam pëen utpetat won wiaan Anuturing lup kopëtemer sak önëen kosang sak ön. Pël ëen pi arën itaangkën pangk ëëpnaat.

<sup>15</sup> Aköpök pim akunet wali yewas pöten kön wiin tiar pourö utpetetakaan kama niöpënëak yaë pël wasën. Ngön pöt tiarim kar panëëp Pool Anutuuk könö kaö wes mangkën puuk nant retëng ë ninaut.

<sup>16</sup> Yaap, omën pipotön pim pep poutë tapël retëng ëa. Ngön pim pepatë wia pöt, nant könömöt, pötë songönöt koirëpenaataan ya kaö mën yeë. Ngön pöt omën kön wonre lup wiapre kor yaaö



narö pitök ngönën pep muntatë yaë pöl wa irikor äak ë yaë. Pël yeem kö sêpënëak yaë.

<sup>17</sup> Nem kar panëerö, ar ngaan wa korkor ngön pöt ök niaan kat wiaurö. Pötaanök omën ngön wa yoola piporöa utpet yaautök wer niön arim lupöt këlok sak wiap sêpanëën ngarangk këëkë ëën.

<sup>18</sup> Pël äak tiarim Aköp Yesu Kristo utpetetakaan kama yaniwaup pim komre kolapta songönte ewat sak kosang sën. Tiarim piin ping wesak yaaut kosang wiakaim wiaap. Yaap.

[Yok pi tapët.

Ne arim karip, Pita.]

**NGÖNËN PEPEWER**  
**The New Testament in the Weri Language of Papua**  
**New Guinea**  
**Nupela Testamen long tokples Weri long Niugini**

copyright © 1984 Wycliffe Bible Translators, Inc.

Language: Weri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 1 Oct 2024 from source files dated 31 Aug 2023

ec1ac06d-1c8c-5be3-8326-dcf0ceacd4c2